

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-215/13
Sarajevo, 15.02.2013. godine

Z A P I S N I K
12. VANREDNE SJEDNICE DOMA NARODA PARLAMENTA FEDERACIJE
BOSNE I HERCEGOVINE, održane 15. februara 2013. godine

Sjednica je počela u 13.30.

Sjednici je predsjedavao Radoje Vidović, predsjedavajući Doma naroda Parlamenta Federacije BiH.

Na početku sjednice predsjedavajući je pozdravio delegate, premijera Federacije Nermina Nikšića, ministre u Vladi Federacije, predstavnike ureda predsjednika Federacije i predstavnike akreditiranih medijskih kuća koji prate rad sjednice i goste.

Izostanak sa sjednice nije niko opravdao.

Na osnovu evidencije Stručne službe, predsjedavajući je konstatovao da sjednici prisustvuje 50 delegata, što čini većinu, te Dom naroda može raditi i punovažno odlučivati.

Predsjedavajući je podsjetio delegate da je na osnovu člana IV.B.2.5.(3) Ustava Federacije Bosne i Hercegovine koji je izmijenjen Amandmanom XLV. na Ustav Federacije Bosne i Hercegovine i člana 124. stav 3. Poslovnika o radu Doma naroda Parlamenta Federacije Bosne i Hercegovine - 35 delegata Doma naroda Parlamenta Federacije Bosne i Hercegovine podnijelo Prijedlog za izglasavanje nepovjerenja Vladi Federacije Bosne i Hercegovine.

Prijedlog je dostavljen i predsjedavajućem Predstavničkog doma Parlamenta Federacije Bosne i Hercegovine, predsjedniku i potpredsjednicima Federacije Bosne i Hercegovine i Vladi Federacije Bosne i Hercegovine, koja je bila dužna u roku 30 dana od dana prijema ovog prijedloga dostaviti izvještaj sa svojim mišljenjem i stavovima u vezi sa ovim prijedlogom.

Vlada Federacije Bosne i Hercegovine nije dostavila ovaj izvještaj u predviđenom roku.

Kako je članom 126. stav 3. Poslovnika o radu Doma naroda predviđeno da se Prijedlog za izglasavanje nepovjerenja Vladi Federacije Bosne i Hercegovine stavlja na dnevni red prve naredne sjednice po isteku roka, Kolegij Doma naroda je zakazao sjednicu na kojoj bi se obavila rasprava o ovome prijedlogu.

Predsjedavajući je obavijestio delegate da je Centralna izborna komisija Bosne i Hercegovine obavijestila Dom naroda Parlamenta Federacije Bosne i Hercegovine da je delegat **Darko Horvat** imenovan na funkciju ministra zdravlja Kantona 10, te više ne može vršiti funkciju delegata u Domu naroda.

Centralna izborna komisija dodijelila je mandat sljedećim kvalifikovanom kandidatu iz reda srpskog naroda iz Kantona 10 **Marku Bosniću**.

Kolegij Doma naroda predlaže da se u dnevni red ove sjednice kao 1. tačka dnevnog reda uvrsti - Verifikovanje mandata delegatu u Domu naroda.

Sa 47 glasova za, Dom naroda Parlamenta Federacije prihvatio je da se ova tačka uvrsti u dnevni red sjednice kao 1. tačka.

U raspravi o predloženom dnevnom redu učestvovali su Amir Zukić, Zijat Mušić i premijer Nermin Nikšić.

Amir Zukić je postavio pitanje premijeru Federacije zašto je Prijedlog za izglasavanje nepovjerenja Vladi Federacije Bosne i Hercegovine, koji je dostavljen premijeru 16.01.2013. godine, protokolisan na protokolu Vlade Federacije 21.01.2013. godine. Izjavio je da bi se rok od 30 dana za dostavu Izvještaja trebao računati od dana protokolisanja Prijedloga. Stoga je predložio da se sjednica odgodi kako bi se ispoštovao rok i dala mogućnost Vladi Federacije da se izjasni.

Zijat Mušić je podsjetio delegate da je Dom naroda na 12. sjednici donio zaključke kojima je zadužena Vlada Federacije Bosne i Hercegovine da do kraja januara 2013. godine u parlamentarnu proceduru uputi sveobuhvatni zakon u kojem će biti uvršteni pripadnici braniteljskih organizacija koji imaju pravo na prijevremenu starosnu penziju. Ukoliko Vlada Federacije Bosne i Hercegovine do kraja januara 2013. godine ne dostavi u parlamentarnu proceduru sveobuhvatni zakon u kojem će biti uvršteni pripadnici braniteljskih organizacija koji imaju pravo na prijevremenu starosnu penziju, zadužuje se Kolegij Doma naroda Parlamenta Federacije Bosne i Hercegovine da Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima uvrsti u dnevni red sjednice Doma naroda koja će biti održana krajem januara 2013. godine. Zatražio je da se ovo pitanje što prije riješi.

Predsjedavajući Doma naroda je odgovorio kako vjeruje da će se ovo pitanje brzo riješiti.

Premijer Nermin Nikšić je izjavio da je Prijedlog za izglasavanje nepovjerenja Vladi Federacije iz Doma naroda u glavnom protokolu Vlade Federacije u koji dolazi sva pošta upućena premijeru ili ministrima zaprimljen 16. januara kada je i protokolisan. Nakon što je premijer pripremio izjašnjenje za Vladu Federacije, protokol Vlade Federacije je 21. januara protokoliso Prijedlog za izglasavanje nepovjerenja Vladi Federacije i dostavio Vladi Federacije na izjašnjenje. Većina ministara je odbila uvrštavanje u dnevni red ovog prijedloga tražeći dodatne rokove za izjašnjenje Vlade.

U vezi sa sveobuhvatnim zakonom u kojem će biti uvršteni pripadnici braniteljskih organizacija koji imaju pravo na prijevremenu starosnu penziju premijer je odgovorio da su u toku razgovori sa Međunarodnim monetarnim fondom i da će ovaj zakon biti brzo u proceduri.

Amir Zukić je izjavio da je iz premijerovog izlaganja evidentno da je Prijedlog primljen u Vladu Federacije 21. januara te predložio da se ova sjednica odgodi i da mogućnost Vladi da se izjasni o Prijedlogu.

Izjavio je da je 2/3 članova Kluba delegata bošnjačkog naroda podnijelo zahtjev za održavanje vanredne sjednice Doma naroda na kojoj bi se razmatrao Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima.

Predsjedavajući je izjavio da je Prijedlog za izglasavanje nepovjerenja Vladi Federacije dostavljen 16. januara i da je za Dom naroda bitan ovaj datum.

Amir Zukić je izjavio da je 2/3 članova Kluba delegata bošnjačkog naroda donijelo Odluku o vitalnom interesu Kluba Bošnjaka u Domu naroda Parlamenta

Federacije Bosne i Hercegovine u slučaju donošenja odluke o izglasavanju nepovjerenja Vladi Federacije Bosne i Hercegovine izabranoj 17.03.2011. godine.

Potom je predsjedavajući dao na glasanje prijedlog Amira Zukića da se odgodi današnja sjednica.

Na osnovu rezultata glasanja, predsjedavajući je konstatovao da Dom naroda nije prihvatio prijedlog Amira Zukića da se odgodi današnja sjednica, jer je za glasalo 16 delegata, jedan delegat je bio uzdržan a 35 delegata je bilo protiv.

Budući da nije bilo više prijedloga za izmjenu i dopunu dnevnog reda, predsjedavajući je konstatovao da je Dom naroda Parlamenta Federacije Bosne i Hercegovine, sa 35 glasova za, uz tri glasa protiv i uz 13 uzdržanih glasova, usvojio sljedeći:

DNEVNI RED

1. Verifikovanje mandata delegatu u Domu naroda Parlamenta Federacije Bosne i Hercegovine,
2. Prijedlog za izglasavanje nepovjerenja Vladi Federacije Bosne i Hercegovine (podnosioci: 35 delegata u Domu naroda).

1. Verifikovanje mandata delegatu u Domu naroda Parlamenta Federacije Bosne i Hercegovine.

Centralna izborna komisija Bosne i Hercegovine obavijestila je Dom naroda Parlamenta Federacije Bosne i Hercegovine da je prestao mandat **Darku Horvatu** zbog imenovanja na funkciju ministra zdravlja Kantona 10 i dodijelilo mandat sljedećim kvalifikovanom kandidatu iz reda srpskog naroda **Marku Bosniću**.

Mandatno-imunitetska komisija je na svojoj sjednici razmatrala ovaj prijedlog i sačinila izvještaj. Izvještaj Mandatno-imunitetske komisije obrazložio je Đuro Prkačin, predsjednik Komisije, koji je predložio Domu naroda da verifikuje mandat delegatu Marku Bosniću.

U raspravi nije niko nije učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 50 glasova za i uz jedan uzdržani glas, usvojio Izvještaj Mandatno-imunitetske komisije i time verifikovao mandat delegatu u Domu naroda Parlamenta Federacije Bosne i Hercegovine **Marku Bosniću** iz reda srpskog naroda iz Skupštine Kantona 10.

Nakon toga delegat Marko Bosnić je dao svečanu izjavu.

2. Prijedlog za izglasavanje nepovjerenja Vladi Federacije Bosne i Hercegovine (podnosioci: 35 delegata u Domu naroda)

Predsjedavajući je podsjetio delegate da je 35 delegata Doma naroda Parlamenta Federacije Bosne i Hercegovine podnijelo Prijedlog za izglasavanje nepovjerenja Vladi Federacije Bosne i Hercegovine.

Predstavnički dom je na 12. vanrednoj sjednici od 12.02.2013. godine donio Odluku o izglasavanju nepovjerenja Vladi Federacije Bosne i Hercegovine. Tom prilikom Predstavnički dom usvojio je i Zaključke.

Prijedlog za izglasavanje nepovjerenja Vladi Federacije Bosne i Hercegovine obrazložio je Aner Žuljević. Nakon toga se o ovom prijedlogu izjašnjavao premijer Nermin Nikšić.

U raspravi su učestvovali: Amir Zukić, predsjednik Kluba delegata bošnjačkog naroda, koji je zamolio predsjedavajućeg ako je moguće da se ministri na sjednici izjasne o Prijedlogu za izglasavanje nepovjerenja Vladi Federacije Bosne i Hercegovine i Ivo Tadić koji se usprotivio ovom prijedlogu.

Nakon toga predsjedavajući je dao pauzu kako bi se Kolegij izjasnio o prijedlogu Amira Zukića.

Nakon pauze, predsjedavajući je rekao da Kolegij nema ništa protiv da se jedan od ministara obrati Domu naroda.

Sanjin Halimović, federalni ministar razvoja, poduzetništva i obrta, obratio se Domu naroda.

U daljnjoj raspravi učestvovali su: Josip Perić, Predrag Kojović, Amir Zukić, Damir Čardžić, Ekrem Prošić, Aner Žuljević, Vesna Saradžić, Zoran Jovanović, Jasenko Tufekčić, Dževad Rađo, Ivo Tadić, Esed Radeljaš, Zijat Mušić, Daliborka Milović, Adnan Jupić, Sretko Radišić, Elvira Abdić-Jelenović i Hajrudin Bećirović.

Nakon rasprave, predsjedavajući je dao pauzu na prijedlog Amira Zukića.

Nakon pauze, predsjedavajući je podsjetio delegate da je 2/3 članova Kluba delegata bošnjačkog naroda podnijelo zahtjev da se ovaj prijedlog za izglasavanje nepovjerenja Vladi Federacije Bosne i Hercegovine razmatra po proceduri predviđenoj za vitalni nacionalni interes, te da će se glasati prvo po klubovima naroda, a potom će se Dom naroda izjasniti u cjelini o ovom prijedlogu.

Odluka o izglasavanju nepovjerenja Vladi Federacije Bosne i Hercegovine smatrat će se donesenom ako većina svakog kluba glasa za Prijedlog za izglasavanje nepovjerenja Vladi Federacije Bosne i Hercegovine i ako većina delegata od ukupnog broja delegata u Domu naroda glasa za Prijedlog za izglasavanje nepovjerenja Vladi Federacije Bosne i Hercegovine.

Ako Odluka o izglasavanju nepovjerenja Vladi Federacije Bosne i Hercegovine ne dobije većinu glasova jednog od klubova konstitutivnih naroda, a dobije većinu glasova Doma naroda u cjelini, Ustavni sud Federacije Bosne i Hercegovine odlučit će da li se Odluka o izglasavanju nepovjerenja Vladi Federacije Bosne i Hercegovine odnosi na vitalni interes bošnjačkog naroda.

Predsjedavajući je zamolio sekretara Doma naroda Izmira Hadžiavdica da izvrši poimenično glasanje po klubovima naroda.

Sekretar Doma naroda prvo je prozvao Klub delegata bošnjačkog naroda da se izjasni o Prijedlogu za izglasavanje nepovjerenja Vladi Federacije Bosne i Hercegovine izabranom 17.03.2011. godine.

Na osnovu rezultata poimeničnog glasanja, predsjedavajući je konstatovao da Klub delegata bošnjačkog naroda **nije usvojio** Prijedlog za izglasavanje nepovjerenja Vladi Federacije Bosne i Hercegovine jer je 12 delegata bilo protiv a pet delegata je glasalo za.

Nakon toga poimenično se izjasnio Klub delegata hrvatskog naroda.

Na osnovu rezultata poimeničnog glasanja, predsjedavajući je konstatovao da je Klub delegata hrvatskog naroda, sa 15 glasova za i uz jedan uzdržani glas, usvojio Prijedlog za izglasavanje nepovjerenja Vladi Federacije Bosne i Hercegovine.

Zatim je izvršena prozivka Kluba delegata srpskog naroda.

Na osnovu rezultata poimeničnog glasanja, predsjedavajući je konstatovao da je Klub delegata srpskog naroda, sa 14 glasova za i uz tri glasa protiv, usvojio Prijedlog za izglasavanje nepovjerenja Vladi Federacije Bosne i Hercegovine.

Nakon izjašnjavanja po klubovima naroda predsjedavajući je pozvao Dom naroda u cjelini da se izjasni o Prijedlogu za izglasavanje nepovjerenja Vladi Federacije Bosne i Hercegovine.

Na osnovu rezultata glasanja, predsjedavajući je konstatovao da je Dom naroda većinom glasova, sa 38 glasova za, uz 16 glasova protiv i uz jedan uzdržani glas, donio Odluku o izglasavanju nepovjerenja Vladi Federacije Bosne i Hercegovine.

Predsjedavajući je izjavio da je Dom naroda većinom glasova donio Odluku o izglasavanju nepovjerenja Vladi Federacije Bosne i Hercegovine, a da većina članova Kluba delegata bošnjačkog naroda nije glasala za ovu odluku, te će se ona proslijediti Ustavnom sudu Federacije Bosne i Hercegovine radi donošenja konačne odluke da li se Odluka o izglasavanju nepovjerenja Vladi Federacije Bosne i Hercegovine odnosi na vitalni interes bošnjačkog naroda. U slučaju da Ustavni sud odluči da se ova odluka ne odnosi na vitalni interes bošnjačkog naroda, smatrat će se da je Odluka donesena prostom većinom.

Sjednica je završena u 16.35.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVALAČI

Radoje Vidović